

國朝耆獻類徵初編卷四百五目錄

儒行十一

潘恬如

周好生

俞存齋

朱用純

李經世

劉源淥

孫子簠

陳佩

陳復平

康姬冕

子乃心

田蘭芳

張森

全軌

翟安宅

李夢箕

補錄

全軌

國朝耆獻類徵初編卷四百五

通奉大夫前署江西巡撫江西布政使司布政使湘陰李桓輯
儒行十一

潘恬如

潘先生諱恬如字克先長洲諸生也行醇而學茂以師道推重鄉
黨間余視先生爲執友今年六月先生壽登八秩余投一詩侑先
生觴及八月某日忽見先生貽書西堂曰病已弗起矣生吾順事
殉吾甯到此方覺真實受用爲我謝諸同學且謂余詩實獲我心
嗚呼先生可謂瞭然於生死之際矣非夫生平潛修深造其烏能
如是乎余旣用先生臨歿語作輓詩二章更欲闡幽發微俾四方

聞者知儒林中沒世可稱如先生實未易得也乃作誄曰

鄒魯堂空洛閩路塞功利漸濡聲華炫溢儒行頽靡師道蕩軼黨
庠術序未由矜式猗歟先生風規挺出有睟其容弗漓其質敬以
束躬誠以畜德方言矩行宮牆羽翼斂鐸韜光時不見識邈也無
悶困也勿恤弟子受詔威儀秩秩几席無聲步趨有則循序致精
辨疑解惑經師人師庶幾允克既享遐齡彌徵恂慄子處無營窮
鄉壤壁芒履苧袍水飲疏食天君泰然素位自得仁壽斯宜歌詩
之抑惜未著書輝煌卷帙獨有微言闡自疾革生順歿甯大事已
畢告終親朋馳箋絕筆西銘仁體誰其窺測承是提撕契我淵密
如撥雲霧方臨杲日死生之故晝夜消息童髦淪胥歲月浪失聲

銷影謝神明奔逸或負而趨輪轉不息唯聞道者性天協一乘化
俱盡不震不怵遊於太虛返於無極嗚呼敝衾而殮適於袞飾淺
壤而葬安於隧域不染世榮不遺身貳先生令名於今罕匹吾作
誄詞敬告副墨

右誄彭定求撰

按潘先生康熙
三十五年卒

周好生

當湖陸先生困學齋記曰好生周子名其讀書之所曰困學齋謂
余記之余以爲困而學非難知困爲難夫人心苟有所困心溺焉
身汨焉膠固而不可拔方且自以爲適豈知困哉吾見今天下之
學者不陷溺於佛老則迷沒於詞章舍坦途而入荆棘困莫甚焉
然冒自以爲困耶今吾與好生幸讀程朱之書知其大綱彼之迷
溺而不自覺者吾知免矣然天下之困人者非獨此也一心之微
日用之閒利害得喪愛憎毀譽困之者常四面而至乘閒伺隙受
其束縛而不知能開柱下天竺之雲霧而或不能不徘徊於一官
一爵之得失能破姚江金谿之藩籬而或不能不猶豫於一錙一

銖之有無能埽顏謝徐庾之綺麗而或不能不動色於閭巷匹夫之喜怒一有入焉則吾之學皆爲其所困嗚呼知之者豈不難哉然則如之何曾子曰吾日三省吾身能省然後能困知困然後能學日用之閒凡接於吾耳入於吾目發於吾心者必察之必防之知其在桎梏之中則必思所以脫於桎梏矣知其在波濤之內則必思所以出於波濤矣聖賢居敬窮理之學雖欲頃刻離之而可得耶遂書之以爲記當與好生共勉焉孔孟程朱豈遠乎哉翠庭雷先生曰余向見當湖陸先生集多與周好生書心知陸先生勵切道義之友有周先生在京師則聞松江有周丈簡庵比視浙學延爲兒輩師余資麗澤焉一日出所編次困學錄示余卽好生先

生之書錄分雜記文集爲二冊循環讀之言簡而義該意愜而理切皆近裏著己之實功闢邪砭俗之要務非用心於內者不知好也竊謂先生殆似曹月川陸先生可擬辭文清然辭曹二先生生平未嘗相見先生與陸先生較古人爲多幸焉當是時南有黃黎洲北有孫夏峰顏習齋人品卓絕而學皆不純夏峰門人魏蓮陸習齋門人李恕谷篤守其師說先生與之往復辨論冀歸於一是唯桐鄉張楊園先生之學當湖起而若合符節先生宗仰楊園與當湖相劇切故粹然一出於正世之學者無志於正學則已苟有志其奉是爲指南庶不至適越而北轅也夫

俞存齋

稼書陸先生與先生書曰向讀紫陽大旨序知先生干城吾道之
盛心未獲親依道範山斗之仰時切寤寐去歲接手教知方從事
二程遺書當王事鞅掌之時不妄談經講義真超出尋常萬萬哉
隴其少不知學徒汨沒制舉業中掇其糟粕未嘗識前輩淵源率
爾涉世動與時違所至掣肘亦思與當世君子熟講而力行之而
年已六旬非復強仕之時行將從十畝詩人歸老於當湖之滸或
得以其暇講理舊業稍稍窺見古人緒餘庶不負此生然非所敢
期也來札過蒙獎許殊非敢當僻處荒城久稽裁荅時切悚惕便
中附候拙刻三種并塵台鑒統希垂照

朱用純

崑山有隱君子曰柏廬朱先生敦厲學行聲光闇然遠近人士沐浴澤者五十年矣今年先生歿自門牆迄於鄉國失其師表咨嗟涕洟相向也余獲交先生晚方冀歲時請益而先生不可復見矣其孤導誠衰經踵門以先生墓銘相屬辭至再三不獲命予觀自昔儒修漢以志節著宋以理學著二者各不相揜然志節不進於理學者有之理學不基於志節者斷未之有也自後世志節日衰理學亦日僞於是毀觚爲圓希世取寵雷同勦說紛樹門庭世道人心何所依賴而不趨於敝壞與若先生者以志節始以理學終列諸漢宋諸儒閒不愧也先生尊君節孝先生諱集璜崇禎中以

諸生貢太學國變守城不屈死先生方補諸生茹哀飲痛遂謝舉業自比王褒之義號曰柏廬家貧授徒贍母潛心於四子六經及濂洛關閩之書晝夜探索融會窅繁反躬實踐細行必矜有來學者授以小學近思錄爲入門法程迎機而導積誠意以動之設講約闡發書義旁達經史又於每歲孟春率諸同人行釋菜禮禮畢講四書一章進止肅恭興起者眾然先生恐學者未能真實切磨嘗作輟講語其略曰中庸成己成物只一誠字統括實實做得聖賢學問不踰一分實實盡得聖賢道理不欠一分方始是誠始是成己成物余今自反果能如是而欲安居舉比多見其不知量也又曰日用常行雖曰道不外是然古之所謂日用常行大段不

失倫常矩矱今之日用常行無非種種惡習人心中只辦得卑鄙
二字倫理上只辦得苟且二字以此爲日用常行更無出頭日子
必須勘破從前魔障跳出阮坎直以聖賢之心爲心聖賢之事爲
事把此日用常行一一正其本位更從上面探討精微方可進道
諸君各出全副精神猛力向前將世道人倫一肩擔起某亦願拜
下風何必區區之言是聽哉居恆罕與人事燕閒無情容言動有
常度中懷耿介不可稍干以私而接之溫然如坐春風中鄉里爭
曲直者必就先生折衷得一言以解嘗曰識得天理熟當機立應
如離弦之矢更不擬議更不矜張真是何思何慮真是行所無事
當路諸公折節慕先生者眾康熙十八年將以博學鴻儒薦先生

固辭乃止邑宰欲舉鄉飲賓復堅謝不應薦紳有納交者亦不輕
報謁也每日晨興盥漱拜謁家祠卽莊誦孝經且廣書楷本勸勉
來學病將革命子弟設先世位具清酌強起拜奠越三日乃歿時
康熙三十七年四月初七日年七十有二所著書有刪補易經蒙
引闡易理特精又自作四書講義多先儒所未發臨歿時以二書
屬其子曰吾將以此見先人於地下復語門弟子曰學問在性命
事業在忠孝言盡此矣又有無欺困衡諸錄道其平日工夫皆切
於學者先生諱用純字致一系出唐孝友先生仁軌後自毫遷睢
宋直閣子榮始來居崑山十三傳至先生妣陶孺人配卽孺人姪
子一導誠邑庠生孫男二直典直衡孫女四以今年十月壬寅葬

於吳縣陽山之上阡銘曰

眞儒挺立孤忠所貽實唯名節爲道藩籬卓哉純孝偉元是師淵
冰臨履豈曰違時性天可聞慎我獨知批繩荒渺剗削支離典刑
弗墜經師人師往從九京潛德無虧遺編在篋尸之祝之勒詞幽
竈徵信來茲

右墓誌銘彭定求撰

朱致一名用純江南崑山人父集璜諸生貢太學 大兵下江東
城陷不屈死致一恫焉慕王褒攀柏之義自號曰柏廬隱居味道
以諸生老其學確守程朱知行竝進而一以主敬爲程長洲徐昭
法與致一爲通家友屢以書問學荅之曰竊觀吾兄酬應人倫微